


維摩詰經

下

百三十三
白三

48105



元祿九年丙子二月日重脩

皇圖聖圖 帝階銀呂

佛日增輝 懋合輪常轉

山城州天安寺法金剛院置

藏

維摩詰經卷下

吳月氏國優婆塞

支謙譯

白

香積佛品第十

於是賢者舍利弗心念曰時欲過是諸天人
 當於何食維摩詰知其意而應曰唯然賢者
 若如來說八解之行豈雜欲食而聞法乎要
 聞法者當為先食是時維摩詰即如其像正
 受三昧上方界分去此刹度如四十二江河
 沙佛土有佛名香積如來至真等正覺世界
 曰眾香一切弟子及諸菩薩皆見其國香氣
 普熏十方佛國諸天人民比諸佛土其香最
 勝而彼世界無有弟子緣一覺名彼如來不



為菩薩說法其界一切皆以香作樓閣經行
香地苑園皆香菩薩飲食則皆眾香其香周
流無量世界時彼佛諸菩薩方坐食有天子
學大乘字香淨住而侍焉一切魔眾皆見香
積如來與諸菩薩坐食維摩詰問眾菩薩言
諸族姓子誰能致彼佛飯皆曰不能即復問
文殊師利卿此眾中未悉了乎荅曰如佛所
言未知當學於是維摩詰不起于座居眾會
前化作菩薩光像分明而告之曰汝行從此
佛土度如四十二江河沙世界到眾香刹香
積佛所往必見食則禮佛足如我辭曰維摩
詰言願得世尊所飯之餘欲於忍界施作佛

事今此懈廢之人得弘大意亦使如來名聲
普聞即化菩薩居眾會前上昇上方忽然不
現舉眾皆見其去而化菩薩到眾香界禮彼
佛足言維摩詰菩薩稽首世尊足下敬問無
量興居輕利遊步康強少承福慶願得世尊
所食之餘欲於忍界施作佛事今此懈廢之

人得弘大意亦使如來名聲普聞彼諸菩薩
皆愕然曰此人奚來何等世界有懈廢之人
即以問佛香積報曰下方去此度如四十二
江河沙刹得忍世界有佛名釋迦文漢言能仁如
來至真等正覺於五濁刹以法解說懈廢之
人彼有菩薩名維摩詰說上法語今遣化來

稱揚我名彼菩薩曰其人何如乃作是化得力無畏神足若斯佛言甚大一切世界皆遣化往化作佛事以立衆人於是香積如來以滿鉢香飯一切香具與化菩薩時彼九万菩薩俱發聲言我等欲詣忍土見釋迦文彼佛報言往族姓子賈尔忍香入彼世界無以人故有放逸意自持汝所樂行勿念彼國菩薩不如無得於彼生廢退意而有勞想所以者何佛土虚空諸佛出世尊欲度人故爲現其刹耳化菩薩既受飯與諸大人俱承佛聖旨及維摩詰化須臾從彼已來在舍維摩詰即化爲九萬師子牀嚴好如前諸菩薩皆坐訖化

菩薩奉佛具足之飯與維摩詰飯香一切熏毗耶離及三千大千世界皆有美香時維耶離梵志居士尊者善慧等聞是香氣皆得未曾有自然之法身意快然具足八萬四千人入維摩詰舍觀其舍中菩薩甚多覩師子座高大嚴好見皆大喜悉禮菩薩諸大弟子却住一面諸香地天人色行天人皆來詣舍維摩詰謂耆年舍利弗諸大弟子言賢者可食如來之飯惟大悲味無有限行以縛意有異弟子念是飯少而此大眾人人當食化菩薩曰四海有竭此飯無盡使眾人食搏若須彌猶不能盡是不可盡所以者何無有盡戒至

于定慧解度知見如來之飯終不可盡於是
鉢飯悉飽衆會飯故不盡諸菩薩大弟子天
與人食此飯已氣走安身譬如一切安養國
中諸菩薩也其香所熏毛孔皆安亦如衆香
之國香徹八難於是維摩詰問衆香菩薩言
諸族姓子香積如來云何說法彼菩薩曰我
土如來無文字說但以其香而諸菩薩自入
律行菩薩各各坐香樹下其香皆熏一切同
等悉得一切香德之定堪任得定菩薩一切
行無所著彼諸菩薩問維摩詰今世尊釋迦
文云何現法維摩詰曰此土人民剛強難化
故佛爲說剛強之語是趣地獄是趣畜生鬼

神之道是爲由身由言由意惡行之報至于
不善惡行滋多故爲之說若干法要以化其
麁獷之意譬言如象馬隴戾不調者之羈絆加
諸杖痛然後調良如是難化侏脹之人爲以
一切苦諫之言乃得入律彼菩薩曰未曾有
如世尊釋迦文乃忍以聖大之意解貧貪人
及其菩薩亦能勞謙止斯佛土甚可竒也維
摩詰曰如卿等言此土菩薩於五罰世以大
悲利人民多於彼國百千劫行諸族姓子此
忍世界有十德之法爲清淨彼土無有何等
十以布施攝貧窮以敬戒攝無禮以忍辱攝
強暴以精進攝懈怠以一心攝亂意以智慧

攝惡智以悔過度八難以大乘樂徧行以種
德本濟無德者以合聚度人民是為十德而
以發意取彼彼菩薩曰為以幾法行無瘡疣
從此忍界到他佛土維摩詰曰有八法行菩
薩為無瘡疣從此忍界到他佛土何等八為
衆設恥避亂羞望為一切人任苦忍諍為諸

善本以救衆生為不巨衆人而愛敬菩薩所
未聞經恣聽不乱不嫉彼供不謀自利常省
已過不訟彼短自檢第一以學衆經是為八
當此維摩詰與衆會及文殊師利說法時滿
百千人發無上正直道意十千菩薩逮得法忍
菩薩行品第十一

是時佛說法於柰氏之園其場忽然廣博嚴
事一切衆會皆見金色賢者阿難問言世尊
是爲誰先瑞應而此場地廣博嚴事一切衆
會皆見金色佛告阿難是維摩詰文殊師利
大衆欲來故先爲此瑞應於是維摩詰報文
殊師利吾欲詣如來此諸大人可共見佛禮
事供養文殊師利言善哉行矣宜知是時維
摩詰即如其像而爲神足使一切衆立其右
掌并諸師子座共行詣佛既到諸菩薩皆避
座而下稽首佛足遷任一面諸大弟子釋梵
四天王稽首佛足皆任一面於是世尊問訊
諸菩薩使各復坐即悉受教衆坐已定佛謂

賢者舍利弗言汝已見菩薩大士之所爲乎
對曰唯然已見佛言以何等相而知其轉對
曰其轉不可念知非意所圖非度所測我覩
其爲不可思議也阿難問佛今所聞香自昔
未有是爲何等香佛言是彼菩薩身毛孔之
香也舍利弗告賢者阿難我等一切諸毛孔
亦得是香阿難言此所從出曰是維摩詰從
香積佛取飯於舍食者一切毛孔皆香若此
阿難復問是香氣轉能久如維摩詰答言至
此飯消曰此飯者幾時而消答曰此飯住止
至七日七夜後乃消化而隨所語弟子行服
食此飯不得道終不消其食此飯而中止者

則不消也新行大道而服食此不得法忍則亦不消若得法忍而食此飯至一生補處其飯乃消譬若阿難阿昏陀藥其香徧一室皆作蜜香氣悉消衆毒藥氣乃歇此飯如是未乎即消至諸垢毒一切除盡飯氣乃消阿難曰彼以佛事作此飯耶佛言如是如是阿難或有佛土以光明作佛事或有佛土以菩薩作佛事有以如來色相名号現作佛事有以衣食苑園棚閣而作佛事有以示現神足變化而作佛事有以虛淨空無寂寞爲作佛事如使達士得入律行有以影響夢幻水月野馬曉喻文說而作佛事有以清淨無身無得無

言無取而為衆人作佛事若此阿難不有是
義及諸所有亦不為人作佛事也以此四魔
八十四垢百千種人為之疲勞是故諸佛為
作佛事故此阿難名為佛法隨所入之法門
菩薩入此門者若得一切好大佛土不以喜
悅得不好土如亦不避其近如來即益起敬
妙哉一切佛法以等度人而佛土不同譬如
有佛土其地若干道所覆蓋不若干也如是
阿難有諸如來為若干像其無礙慧不若干
也正等阿難如來身色威相性大戒定慧解
度知見事力無畏及佛法慈悲護安受行壽
量說法度人是故名為等正覺名為如來名

為佛此三句者其義甚廣使吾以劫之壽未能周竟三千大千申暢其義以知衆生之意上智多聞得念揔持為一切人說是三句之義窮劫未能竟此為等正覺為如來為佛者也是故阿難佛道無量如來智辯不可思議阿難白佛願今而後無稱我為上智多聞佛

自
經
卷
之
一

言阿難汝起疲厭之意於弟子中為最多聞比諸菩薩未有見焉菩薩志願所作弘多一切海淵尚可測量菩薩智慧諸持定念種種所得不可稱度阿難汝且觀菩薩行是維摩詰一時所現德善之本彼諸弟子緣一覺者一切變化於百千劫所不能現也於是衆香

世界菩薩來者以手言如來名等吾甚思念
無有遺忘於此佛土終不起想又如世尊諸
佛權道不可思議以度人故爲隨所欲而現
佛土之好願佛贈我以佛之法遺遷於彼土
當念如來佛告諸菩薩言有盡不盡門汝等
當學何謂爲盡盡謂其有數何謂不盡謂爲無
數如菩薩者不盡於數不住無數以何於數
而不動者謂之大慈不動大悲不捨性以和
樂意而不荒見人而悅奉事聖衆惠施軀命
以受正法種善無猷分德不住學法不解說
教不忘供事佛勸所生不恐具受不慢不輕
未學不爲塵埃守直化生欣樂受彼安身以

力安彼以悅禪定為覺行想生死為善權想
來求為賢友想悉知為具足想所有為布施
想惡戒為依受想不忍為忍默想懈怠為精
進想亂意為知念想惡智為行智想度無極
為父母想道品法為群從想欲行眾善而無
厭足以諸刹好成已佛土生死無數劫意而
有勇聞佛無量德志而不倦勞者為作歸貧
者為作福導守為眾重在曉陰入種降魔兵不
以謀為法淵慧有餘以少求如知足諸世間
已畢竟於眾俗不漸漬得三十際感聖賢現
諸儀式起神通行博聞能諷慧力持念斷眾
人疑知本本根無礙無任為致辯才順化天

人十善為淨梵迹為立行四無量致佛音聲
為法都講道至善行得佛仙路損身口意行
欲殊勝喜在眾經取菩薩眾以大乘化德行
不貶善法不惑如是諸族姓子以應此法者不
盡數也何謂菩薩不住無數謂求為空不以
空為證求為無相無數無願不以無相無數
無願隨至為證觀於無常不厭善本觀世間
苦以誠信生觀於非身誨人不倦觀寂然法
寂然而無轉觀退轉者身意不隨觀無處所
為任生死以度斯漏觀無所行為行導人觀
於無我以大悲乘而成濟之觀無所生不隨
弟子緣一覺律觀於惶荒不荒福德觀夫虛

無不虛正智觀於言語不猷智慧觀無有主
應自然智觀無適莫義合則行是為諸族姓
子菩薩不任無數又復不盡數者為合會福
不任無數者為合會慧不盡數者為行大慈
不任無數者為有大悲不盡數者為導人
不任無數者為求佛法不盡數者為具佛身
相不任無數者為具一切智不盡數者為行
善權不任無數者為出智慧不盡數者為淨
佛土不任無數者為佛立故不盡數者利誘
進人不任無數者現人利故不盡數者計會
善本不任無數者施善力故不盡數者為具
所願不任無數者為本願故不盡數者為具

滿性不住無數者為性淨故不盡數者為五
通不邪不住無數者知佛六通故不盡數者
行度無極不住無數者無滿時故不盡數者
求諸佛寶不住無數者不求無寶處故不盡
數者習行眾藥不住無數者知彼眾病故不
盡數者生死自然不住無數者泥洹自然故

於是彼諸菩薩聞此喜悅皆生善心諸是三
千大千世界一切好華積至于膝以供養佛
稽首佛足右遶三匝以次合聚於是佛土忽
然不現須臾之間已還彼國近香積佛

見阿閼佛品第十二

於是世尊問維摩詰汝族姓子欲見如來為

以何等觀如來乎維摩詰曰始不以生終不
以數今則不住空種是同入無所積眼耳鼻
口身心已離三界不疲解三脫門得三達智
為無所至至一切法得無礙立積於誠信如
無所任如慧無雜不生因緣不為相不熟相
不一相不非相不無視不為視不熟視不暫
視不此岸不度泥不中流不以此不以彼不
以異不解慧不住識無晦無明無顯無名無
弱無強無教無不教無淨無不淨無數無不
數無言無不言不施不受不戒不犯不忍不
諍不進不怠不禪不乱不智不愚不誠不欺
不出不入不住不及斷諸雜聲非有土非無

土非有餘非盡賜非摸非想非著捨著平等
正法非量非稱非過非逝非作非見非聞非
意非識度諸所生亦至諸慧等諸人物說一
切法無所生無所有無罣礙一切受無不樂
作無刺無擊無減無貶無固無畏無憂無喜
無聲一切滅說無語如是世尊如來身為若
此為如是觀如是觀者名為正觀以他觀者
猶為邪觀賢者舍利弗承佛聖旨而問佛言
是人何沒來生此土佛言汝自以是問維摩
詰舍利弗言族姓子汝於何沒而來生此維
摩詰言如卿賢者以法為證沒當何生曰安
有斯法沒而生者維摩詰曰若無沒生何有

諸法曷云如是汝於何沒而來生此幻士造
化爲男爲女寧有沒來舍利弗言化者無沒
生也維摩詰曰如來不云一切法化自然荅
曰如是曰化自然相非諸法耶曷云如是汝
於何沒而來生此也沒者舍利弗爲行盡賜
生者爲行長益菩薩沒者不盡善本生不長
惡佛告舍利弗是族姓子本從阿閼佛阿維
羅提世界來阿閼佛者漢言無怒
羅提者漢言妙樂也舍利弗言
希有世尊是族姓子乃從清淨佛土而來樂
此多怒之虬維摩詰言云何賢者夫曰一切
周行冥中爲樂冥所不荅曰不然曰不休者
其明堪任行衆冥故也曰夫曰奚故行閻浮

提上荅曰欲以明照為之除冥曰如是賢者
菩薩若生不淨佛土則淨其人不俱為汙一
切所近輒為除冥是時大衆渴仰欲見妙樂
世界阿閼如來及其大人佛知一切衆會所
念即請維摩詰言族姓子現此衆中妙樂世
界阿閼如來及其菩薩諸弟子衆皆欲見於
是維摩詰言菩薩自念吾當止是師子座而
不起為現妙樂世界鐵圍山川溪谷江湖河
海州域須彌衆山明冥日月星宿龍神天宮
梵宮及衆菩薩弟子具足國邑墟聚人民君
王阿閼如來及其道樹所坐蓮華其於十方
施作佛事及其三重寶階從閻浮利至忉利

宮其階忉利諸天所以下閻浮利禮佛拜謁
供事聞法閻浮利人亦緣其階上忉利宮天
人相見如是無數得好之樂從妙樂世界上
至第二十四阿迦膩吒天又欲斷取來供養
入此忍界使一切衆兩得相見維摩詰念欲
喜衆會即如其像正坐三昧而爲神足居諸
衆前於師子座以右掌接妙樂世界來入忍
土彼得神通菩薩天人弟子見接舉來皆稱
白唯然世尊哀取我唯然世尊安立我阿閼
佛以方便受衆人而解曰非我所爲是維摩
詰所接其餘天人不知誰取我而往而妙樂
世界入此忍土不增不減又此土不迫隘而

彼土亦不損也於是世尊釋迦文告諸衆曰
汝等觀是妙樂世界阿閼如來其土嚴好菩
薩行淨弟子清白皆曰唯然已見願受如是
淨妙佛土諸菩薩皆欲追學阿閼如來菩薩
所行其於是見彼阿閼如來佛土者十四姪
人起無上正直道意皆願生妙樂世界佛即
託說是輩皆當生妙樂土又當來化我此忍
界一切化已當復還彼佛問舍利弗汝已見
妙樂世界阿閼如來如是世尊見彼土人一
切淨好皆得神足如維摩詰我等世尊快得
善利得與是輩正士相見與之從事在在人
人間是法者快得善利誰聞是語而不好信

如有手執翫習諷讀是爲得佛行念如有諷
起是經法者爲受正法爲捨衆道爲如來到
其舍若究暢書隨是法說而敬事者是爲得
佛福施得大法智其以此經四句頌教爲同
學說是爲已得記蒞爲得法樂已甚解矣
法供養品第十三

於是天帝釋白佛言多福哉世尊得近如來
文殊師利者雖百千聞未有若此純法化者
也已宿曾聞是法不癡故使其人得此法乘
能受持誦況我面值應心與合諸受此者吾
無所違若一切見軌迹不離諸佛者於諸彼
轉其以得勝爲降衆魔而來體道意佛念其

人必得持是法者吾與官屬當助安之在所
墟聚國邑有以是法教勸說者吾與官屬共
詣其所其未樂之天人吾當起其樂必以喜
樂而營護法佛言善哉善哉天帝吾代尔喜
是諸去來現在佛得道者皆說是法若是天
帝欲得供養去來現在諸佛世尊當受是法
持誦自清宣示同學正使天帝三千大千世
界如來滿中譬如甘蔗竹蘆稻麻叢林甚多
無數皆為如來有賢者子賢者女於一劫若
百劫敬之事之奉養之一切施安進諸所樂
至諸佛般泥曰一一等意穿地藏骨立七寶
塔周於四方彌滿佛界高至梵天施設蓋幡

爲諸佛別造塔皆於一劫若百劫供養衆華
衆蓋幢幡伎樂云何天帝此人殖福能增多
不曰多矣世尊彼之福祐不可稱說億百千
劫佛告天帝當以知此賢者子賢者女受此
不思議門所說法要奉持說者福多於彼所
以者何法生佛道法出諸佛其能供養此正
法者非思欲施輩當以知此佛告天帝有昔
過去無數劫不可稱計時世有佛名毘沙闍
羅所藥王言如來至真等正覺明行成爲善逝
世間解無上士道法御天人師号佛世尊其
世界名大清劫曰淨除彼時天帝藥王如來
壽三十劫其弟子衆凡三十六億姪菩薩十

二億是時有轉輪聖王名曰寶蓋王有七寶
王四天下五劫奉事藥王如來率其官屬施
諸所安至五劫中聖王寶蓋召其千子而告
之曰汝等已見如來當共奉事施以所安於
是千子聞父王命皆以安和復至五劫供養
藥王如來并其官屬一切施安第一太子名
曰善宿獨坐自念寧有供養殊過此者空中
有天承佛聖旨應曰正士法之供養勝諸供
養即問何謂法之供養天曰何不行問藥王
如來佛當為汝說法之供養於是太子善宿
即起行詣藥王如來稽首佛足而問法之供
養為法現者是何謂也藥王佛言法供養者

如佛所說衆經奧藏深邃之言諸世所歸非
爲難受難見之輩以無憍慢微妙無像其義
夷易菩薩篋藏修至諸持經印所封非無道
理其輪清淨入六度無極善取學道品法淨
入正之事爲下大悲達于大慈離諸大見覩
本緣起非人非命非女非男如空無相無願
無爲道地之行法輪之際天人百千所共歎
譽法藏多度含受衆人明宣諸佛菩薩道行
爲入有義法之正要下於無常苦空非身戒
無所犯一切彼轉見爲怖畏師仰諸佛覩夫
生死而不與同現滅度安習如是像衆經微
言分別惟觀而以受法是爲法之供養又族

姓子法供養者為聞法生法法轉成緣起隨
順離諸際見為如不生不起法忍非身非人
為上因緣無違無受如無所諍以捨我作而
依於義不以嚴好以隨聖典而依於惠不為
文飾處處入義而依於經不習非義以所懷
戢而依於法不用人所見得諸法無受入無
處所滅於不明滅於行滅於識名色六入更
樂痛愛受有生老死苦一切以滅如是滅如
是觀十二因緣起以不可盡而受微妙人所
視見而以不視是族姓子名為無上法之供
養如是天帝太子善宿從藥王如來聞法供
養便得順忍即解寶衣以覆佛上而言曰余

以堪任於如來滅後奉受正法作法供養擁
護是道惟願如來加哀豎立令我得降魔怨
取佛正法彼佛知其內性即說曰末後汝當
守護法城於時善宿從見世尊以家之信捨
家受道勤修德本精進不久即立善法起五
神通得入諸道之持不斷辯才遂於世尊躬
泥洹後以智慧力至滿十劫藥王如來所轉
法施隨而分布於時善宿比丘化十億人使
立大道十四姪人解弟子乘餘無量人得生
天上如是天帝在昔異時王寶蓋者於今得
佛名寶成如來其太子善宿者則吾身是也
其餘諸子於是賢劫皆得如來至真等正覺

此賢劫中千佛興者是也從鳩留先爲始作
佛至樓油如來爲最後得如是天帝當知此
要昔者我身於諸如來行法供養得爲上化
爲長化爲願化爲無上無比之化是故天帝
當以知此法之供養供養於法

囑累弥勒品第十四

彼時佛告弥勒菩薩言弥勒是名爲無數億
劫習佛道品汝隨分布受是像經佛所建立
如來滅後廣傳此道所以者何後世得者族
姓子女天龍鬼神捷沓起當下德本其於前
生已作無上正直道行而未得聞受此法者
聞是輦經必甚愛樂當頂受此佛之要道又

汝彌勒當利是輩諸族姓子於時當為布現
是經又菩薩有二印何謂二有喜雜句嚴飾
之印有入深法妙化之印彼若好喜雜句飾
者當知是為阿夷恬菩薩輩也若得是深經
書受廣行不以數數有畏聞之能傳當知是
菩薩為久修梵行復有四事阿夷恬用空耗
何謂四所未聞經聞之驚疑不作勸助專增
為亂吾未曾聞此從何來若族姓子甚解深
法樂說微妙不從受習雖近不敬專於中作
毀行是為四阿夷恬為空耗不得至深法忍
又彌勒有二行菩薩雖解深法猶以空耗何
謂二習在邊方不恒其行檀智憐人不受不

誦亦不追求自有甚解學深法者則以輕慢
貪濁懷嫉不能納人亦不法施是為二雖解
深法猶以空耗不能疾近不起法忍於是彌
勒菩薩白佛言未曾有唯然世尊至於如來
之善言五當遠離如此之惡以護如來無數
億劫道品之習若賢者子心入是輩經者當
今手得恣所念取若念受持如是輩經傳示
同學廣說分明其時世尊得如是經樂喜相
傳者當知此輩菩薩為彌勒所立佛言善哉
善哉彌勒如來代喜善說是言於是一切菩
薩等俱共同出聲言如來滅後我等在所佛
土當來於此分布佛道示諸同學以其所樂

尔時四天王白佛言在所世尊墟聚國邑有
行是深經法者五當率諸官屬詣講法所為
護講法自由旬內當令一切聞見講法今無伺
求得其便者彼時佛告賢者阿難取是經法
奉持誦說以布現人阿難言唯當受是經布
現衆人要者世尊當何名斯經法亦當云何
奉持之佛言阿難是經名為維摩詰所說亦
名為不可思議法門之稱奉持之佛說經已
莫不勸受尊者維摩詰文殊師利為上首衆
菩薩大弟子一切魔衆聞佛所說皆悉歡喜

維摩詰經卷下

